

LLETRES NUEVES

Xuventú

Armaráste con toles armes
que tos manes algamen:
lluvia nel bolsu,
pies calzaos na esperanza
y arrecostinando cola to bondá
dirás lluchar escontra les llaceries ayenes;
u topes seca, pondrás orbayu
onde fame, pan
y si alcuentres odiu
afogaráslu nes tos bonales intenciones,
pero si tienes suerte,
quiciás llegaráte na to xera
ún asemeyáu a ti mesmu
que te dea
nuna caxuca prieta y pervieya
los nomes de les peñes y de los árboles,
de la xente
de la to patria.

XUAN SANTORI VÁZQUEZ

Silenciu

Nestos espacios

glaya'l silenciu

la verdá del escaezu

XUAN SANTORI VÁZQUEZ

Amor de Fueyes

Suerte tenemos
de que tean xuncies
les fueyes a les rames
sinón,
fuxiríen nes Llinies Aérees del Vientu
a la gueta la lluvia.

XUAN SANTORI VÁZQUEZ

Morrer perprestosamente

Cada vegada
piensa ella
dir morrer d'esi taragañu
—al final apuerta ser sólo un roce sabicheru—
que se torna en presión lenta, constante y homoxenia
cola que la bonal bestia enróscase na so enrevexinada presa
faciendo aumentar la humedá caleciente,
col movimientu uniformemente aceleráu,
hasta que'l corazón diz que non,
que nun pue dir más apriesa porque española,
entós,
arrampúña-y la so vida, líquida, a la so víctima agradecida,
pa qu'algame dafechu
la más fondera
y sele
quietú.

XUAN SANTORI VÁZQUEZ

4 Poemes de Leopoldo M^a Panero*

Los nobles desperraos en xardinos

Los nobles desperraos en xardinos
los nobles desperraos en xardineros
los nobles desperraos en xardinos
con escobes barríen los restos la carne
los nobles desperraos en xardinos

Marqués de Sade

Morrió en Sicilia cuntando ventisiete años**
un nome y la semeya d'un cuerpu
(ensin alma nel cuerpu morría en xuegu roxu
espluma pela boca, moyaos sonos
y una calavoria enxaulada ente les sábanes
la tema puntiada aguantando la pallabra
y dicha comu silenciu, comu vacú nel testu
sabañones, atapecés so la cama
entantes s'esmirría'l falu nuna topinera de plombu).

* Torna de X. Ll. Campal.

** "Morrió en Sicilia cuntando ventisiete años" (Kavafis).

Licantropi...

Licantropi, hiboux, calavories
degorrios d'escures zones
Homes-Llobu, pozos, pasáu
grilletes les anfileres so
la muñeca de carne rosao
que nun carpe golem mo
mies nummie venti cachos d'oru nel pelo
que nun carpe princesa amburada
bruxes paridores y
la carne humano que muerre los pexes
Licantropi, hiboux, calavories.

Pasadizu secretu

Escuridá ñeve ferres desesperu escuridá mueve
ferres ñeve
ferres castiellos (esperteyos) es
curidá nueve ferres deses
pero ñeve llobos cas
albandonaes rates desesperu e
scuridá nueve ferres des
"ferres", "caballos", "el degorriu verde", "desesperu"
bonalmente planiada escuridá
Escabeciamientos.